

## **MEMORIA XUSTIFICATIVA PARA A CONSTITUCIÓN DUNHA UNIDADE TEMPORAL DE PERSOAL PARA A COLABORACIÓN NA EXECUCIÓN DO PLAN DE MELLORA DAS INFRAESTRUTURAS DA CONSELLERÍA DO MEDIO RURAL**

### **I. Xustificación da imposibilidade de levar a cabo as actuacións previstas en materia edificatoria co persoal actual da Consellería do Medio Rural**

A Consellería do Medio Rural é o órgano da Administración galega ao que lle corresponde propor e executar as directrices xerais do Goberno no ámbito rural, que engloba as competencias en materia de agricultura, gandaría, desenvolvemento rural e ordenación comarcal, estruturas rurais, industrias alimentarias, montes, prevención e defensa dos incendios forestais. Así mesmo, correspóndelle o impulso da actividade económica asociada ao sector forestal, coa mellora da competitividade e da innovación das empresas do sector e coa coordinación dos centros de investigación en materia forestal, sen prexuízo das competencias das vicepresidencias e doutras consellerías da Xunta de Galicia.

O desenvolvemento destas competencias require dispor de infraestruturas cercanas a todas as persoas administradas, ben sexa para a atención directa da poboación (por exemplo, no caso das oficinas rurais) ben para desenvolver con eficiencia as funcións encomendadas (por exemplo, as funcións relacionadas coa prevención e extinción dos incendios forestais).

Así, dentro da estrutura territorial da consellería intégranse as oficinas agrarias comarcais, a través das respectivas xefaturas territoriais, que dependen organicamente da xefatura territorial. A rede de puntos de atención ao sector agrogandeiro que constitúen as oficinas agrarias comarcais ten como función a execución, no seu ámbito territorial, das actuacións da consellería en materia agraria, así como a de prestar apoio técnico e administrativo aos organismos e entes adscritos a ela, sen prexuízo da coordinación das actuacións dos servizos agrarios e veterinarios da estrutura de área e comarcal exercidos, respectivamente, polas correspondentes xefaturas de servizo de Explotacións Agrarias e de Gandaría das xefaturas territoriais. Na actualidade, existen 67 Oficinas Agrarias Comarcais en Galicia, coa seguinte distribución:

#### **Distribución actual das oficinas agrarias comarcais en Galicia**

PROVINCIA	NÚMERO DE OFICINAS
A Coruña	20
Lugo	18
Ourense	15
Pontevedra	14
<b>TOTAL GALICIA</b>	<b>67</b>

Ademais, a Consellería do Medio Rural está tamén establecida no territorio mediante a rede asociada á Administración Forestal, que desenvolve as competencias de ordenación forestal, así como a rede asociada á prevención e extinción de incendios, a través dos distritos forestais, con centros e localizacións principais (bases) e secundarias (sub-bases). Ademais, co fin de lograr unha maior distribución sobre o territorio e, polo tanto, maior rapidez de reacción ante a aparición de incendios forestais, existen 85 localizacións, denominadas actualmente puntos de encontro, nas que se localizan as brigadas de loita contra os incendios forestais. Finalmente, o Servizo de Prevención e Defensa contra os Incendios Forestais conta tamén





coas seguintes 15 bases aéreas de prevención e defensa contra incendios forestais (incluíndo bases de helicópteros de extinción, bases de helicópteros de coordinación e bases de avións de carga en terra).

Polo tanto, as infraestruturas asociadas ao Servizo de Prevención e Defensa contra os Incendios Forestais e á Administración Forestal ascenden a 132, coa seguinte distribución:

**Distribución actual dos distintos centros do dispositivo  
(sen considerar SSCC e XXTT)**

PROVINCIA	NÚMERO DE BASES E SUB-BASES	NÚMERO DE PUNTOS DE ENCONTRO BBFF	NÚMERO DE BASES AÉREAS	TOTAL
A Coruña	7	29	3	39
Lugo	10	22	4	36
Ourense	9	22	5	36
Pontevedra	6	12	3	21
<b>TOTAL GALICIA</b>	<b>32</b>	<b>85</b>	<b>15</b>	<b>132</b>

O amplo despregue territorial exposto está xustificado polo importante servizo público que presta a Xunta de Galicia no ámbito rural, e que require dun estreito contacto entre a Administración autonómica e o sector primario. A presenza desta consellería no territorio provoca que a imaxe que desta Consellería teña a cidadanía no ámbito rural repercuta claramente na da propia Xunta de Galicia neste ámbito.

Non obstante, a rede de oficinas de proximidade require unha adaptación ás necesidades actuais da sociedade, así como unha mellora global do seu estado, co fin de dar un axeitado servizo no ámbito rural, ben sexa de forma directa para a atención do público (OACs e distritos) ou indirecta (puntos de encontro nos que a diario se localizan as brigadas forestais).

O deseño do despregue territorial realizouse en épocas nas que o nivel de dixitalización e telecomunicacións das Administracións Públicas era moi escaso (ou nulo, nalgúns casos) e, polo tanto, moi diferente do actual, así como o nivel da rede viaria galega considerablemente mellorada nas últimas décadas. Neste momento, os sistemas dixitais e a nova rede de infraestruturas permiten e aconsellan realizar un novo enfoque das infraestruturas territoriais, co obxectivo de gañar en axilidade e, en síntese, na calidade de prestación do servizo propio da súa competencia.

A mellora das infraestruturas utilizadas para prestar a atención á poboación rural ten como consecuencias:

1. Mellora de calidade nos servizos que a Xunta de Galicia presta á poboación do ámbito rural.
2. Mellora das condicións laborais dos empregados públicos da Xunta de Galicia.
3. Afección positiva sobre a imaxe da Xunta de Galicia: as condicións das infraestruturas descritas son as que unha porcentaxe dos galegos asocian coa imaxe da Xunta de Galicia e que deben ser acordes cunha Administración moderna, eficiente, áxil e adaptada aos tempos actuais.

Polo exposto, e trala realización das análises oportunas, a Consellería do Medio Rural constatou a urxente necesidade de levar a cabo importantes actuacións de mellora das súas infraestruturas, comezando a execución material das actuacións no ano 2021, e tendo previsto que continúen ata o ano 2026, tanto nas Oficinas Agrarias Comarcais como nas instalacións asociadas ao Servizo de Prevención e Defensa contra os Incendios Forestais, co fin de poder prestar un servizo idóneo á cidadanía.





Os orzamentos previstos para o Plan que engloba as actuacións indicadas son os seguintes:

#### PLANIFICACIÓN OBRAS OFICINAS RURAIS (ANTIGAS OFICINAS COMARCAIS)

ANOS	2021	2022	2023	2024	2025	2026	TOTAL 2021-2026	MODALIDADE PREVISTA DE FONDOS
Reforzo Oficinas Rurais principais (principais oficinas a nivel provincial) ata un total de 8 edificacións	0	1	1,55	3,7	4	2,2	12,45	FP
Acondicionamento e modernización edificios existentes en oficinas de menor tamaño, ata un total de 59	1,9	0,35	0,35	0,5	0,5	2	5,6	FP
Mantemento de edificios e obras urxentes	0,15	0,15	0,15	0,15	0,15	0,15	0,9	FP
Mobiliario, dotación tecnolóxica e outros medios	0,2	0,25	0,25	0,25	0,25	0,25	1,45	FP
<b>TOTAL 2021-2026</b>	<b>2,25</b>	<b>1,75</b>	<b>2,3</b>	<b>4,6</b>	<b>4,9</b>	<b>4,6</b>	<b>20,4</b>	

Cómpre salientar que a día de hoxe, destes 20,4 M€, no ano 2021 executouse un investimento de 1,9 millóns de euros que permitiron o acondicionamento e modernización de 28 oficinas agrarias comarcais co seu correspondente mobiliario e dotación tecnolóxica por outros 0,2 millóns de euros.

#### PLANIFICACIÓN OBRAS INSTALACIÓNS DEFENSA DO MONTE

ANOS	2022	2023	2024	2025	2026	TOTAL 2022-2026	MODALIDADE PREVISTA DE FONDOS
Plan Bases Búo: edificacións modulares de nova construción e rehabilitacións integrais de edificacións senlleiras (15 actuacións)	0,1	2	1,5	1,4	1,4	6,4	2022/2023: REACT-UE 2024 e ss: FP
Plan Bases Búo: rehabilitación de 54 edificacións	0,2	1,7	1	1	1	4,9	2022/2023: REACT-UE 2024 e ss: FP
Bases aéreas: construción dunha nova base aérea en Verín e adecuación doutras 14 bases existentes	0,3	3,2	1	1	1	6,5	2022/2023: INTERREG (Base Verín) 2024 e ss: FP
Unidade lóxística central (Lalín)	1,3	0	0	0	0	1,3	FP
<b>TOTAL 2022-2026</b>	<b>1,9</b>	<b>6,9</b>	<b>3,5</b>	<b>3,4</b>	<b>3,4</b>	<b>19,1</b>	

Por outra parte, dentro desta mesma Consellería, existe un importante volume de actuacións de reforma e melloras edificatorias nos centros de formación e experimentación agraria adscritos á Axencia Galega da Calidade Alimentaria. Cómpre destacar, neste ámbito, a execución de proxectos asociados aos fondos REACT-UE desta Axencia, cunha dotación de 2 M€ para o Centro de Investigacións Agrarias de Mabegondo e 4 M€ para o Centro de Formación e Experimentación Agraria de Sergude (Boqueixón).





O desenvolvemento destas actuacións supón a execución dunha serie de obras que requiren un importante esforzo desde o punto de vista técnico: avaliación da situación inicial, deseño das necesidades, supervisión dos proxectos técnicos, preparación das licitacións de obras e direccións facultativas, valoración de ofertas, seguimento e control da súa execución, etc.

Non obstante, a día de hoxe a Consellería do Medio Rural non conta con persoal técnico para realizar ese seguimento e control, xa que non dispón na súa Relación de Postos de Traballo de perfís de persoas arquitectas ou arquitectas técnicas, o que limita o desenvolvemento destas actuacións ou condiciona a súa idónea execución, ao non ser posible o seu control de forma directa con persoal da propia Consellería.

## **II. Proposta de dotación de persoal e carga de traballo prevista**

Da análise incluída na epígrafe I desta memoria, conclúese que é necesario dispoñer de persoas funcionarias cualificadas para levar a cabo as actuacións indicadas, polo que se propón a creación dunha unidade temporal composta por unha persoa arquitecta (corpos especiais, subgrupo A1, nivel 26) e unha persoa arquitecta técnica (corpos especiais, subgrupo A2, nivel 22), asociada ao desenvolvemento das actuacións indicadas e, polo tanto, durante un período mínimo de 3 anos.

A dispoñibilidade deste persoal permitiría executar as actuacións previstas con garantías e axeitada execución dos fondos (tanto propios como de orixe europea). Dado que as obras previstas pertencen a distintos centros da Consellería do Medio Rural, considérase que a unidade temporal de persoal formada por estas dúas persoas debería depender da Secretaría xeral técnica e, máis concretamente, da Vicesecretaría xeral.

A carga de traballo destas dúas persoas sería elevada, tendo en conta as seguintes magnitudes previstas para estas actuacións:

- 8 obras de grande envergadura en Oficinas Rurais;
- 31 obras de reforma e mellora noutras tantas Oficinas Rurais;
- 15 actuacións de edificacións modulares de nova construción e rehabilitacións integrais de edificacións senlleiras;
- Melloras no resto de Bases de Unidades Operativas (54 adicionais).
- Nova base aérea en Verín e adecuación doutras 14 bases existentes.
- Unidade loxística central de Lalín (en execución actualmente).
- Actuacións puntuais de mellora nos Centros de formación e experimentación da Axencia Galega da Calidade Alimentaria (estimadas en 5 actuacións ao ano), e outras grandes actuacións nos centros adscritos a este axencia (principalmente CIAM, Sergude e Lourizán).

Previamente á execución material das obras, cada unha destas actuacións require unha análise técnica detallada da situación actual, necesidades, solucións arquitectónicas idóneas, orzamentos, así como, no seu caso, preparación das licitacións de obras e direccións facultativas e valoración de ofertas. Ademais, durante á execución das obras, é imprescindible facer un axeitado seguimento e control da súa execución, co fin de obter os resultados agardados.





A incorporación destes efectivos producirase mediante súa publicación en comisión de servizo, no caso de non cubrirse, procederase ao chamamento de persoal funcionario interino procedente das listas de contratación temporal da Xunta de Galicia, reguladas polo Decreto 37/2006. O centro de traballo deste persoal serán as dependencias da Consellería do Medio Rural en Santiago de Compostela.

Santiago de Compostela, na data da sinatura electrónica

O secretario xeral técnico

Nicolás Vázquez Iglesias

